

Morning Regional Dogri News Bulletin, 21 July. 2025

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

- संसद दा बरसांती आहला इजलास अज्जै थमां शुरु होआ करदा ऐ।
- श्री अमरनाथ जी दी जातरा 3 लक्ख दे आंकड़े गी पार करी गई ऐ। एलजी मनोज सिन्हा होरें कल बालटाल बेस कैंप दा दौरा लाइयै श्रद्धालुएं कन्नै गल्लबात कीती ते उं'दे शा सुविधाएं-सेवाएं बारै प्रतिक्रिया लैती।
- किश्तवाड़ जिले च कल सुरक्षाबलें ते आतंकवादिएं बश्कार गोलीबारी दे मगरा अज्ज सुरक्षाबलें दा तुपाई अभियान बरोबर जारी ऐ।
- जंगलात मंत्री जावेद राणा होरें पुंछ च बालाकोट दा दौरा लाइयै उत्थे भारी बरखें ते ल्हास-पस्सियें करी होए दे नुक्सान दा आंकलन कीता।
- मौसम विभाग नै जम्मू-कश्मीर च अज्जै थमां लेइयै 23 जुलाई तोहड़ी भारी बरखें दा येलो ते ऑरेंज अलर्ट जारी कीता ऐ।

<><><><><><>

Monsoon-Session

संसद दा बरसांती आहला इजलास अज्जै थमां शुरु होआ करदा ऐ ते एह् औंदी 21 अगस्त तोहड़ी जारी रौहग। इस इजलास दरान दौनें सदनें दि'आं कुल 21 बैठकां लग्गडन। ध्यानजोग ऐ जे आपरेशन सिंदूर दे बाद पैहली बारी संसद दा इजलास लग्गा करदा ऐ।

संसदी मामलें दे मंत्री किरेंण रिजिजू होरें आखेआ जे इस इजलास दरान केई सारे महत्वपूर्ण बिलें ते कम्में गी तोढ़ चाढ़ेआ जाहग। मेद ऐ जे इस दरान चर्चा ते पास करोआने लेई कुल 17 बिल पेश कीते जाडन। सरकारें आखेआ ऐ जे ओह संसद च पुट्टे जाने आहले सब्भनें महत्वपूर्ण मामलें पर चर्चा लेई पूरी चाल्ली तैयार ऐ।

<><><><><><>

Amarnath-Yatra

3 जुलाई गी शुरू होई दी श्री अमरनाथ जी दी जातरा 3 लकख दा आंकड़ा पार करी गई ऐ। उपराज्यपाल मनोज सिन्हा होरें इस बारें अपनी इक सोशल मीडिया पोस्ट च जातरा गी लेइयें श्रद्धालुएं दे उत्साह पर मता संदोख ते खुशी प्रगट कीती। उनें आखेआ जे अमरनाथें दी जातरा करने दा मौका जीवनै च हर रोज नेई थहोंदा ते इस परम आलौकिक आनंद गी मसूसने दी तांहग रखने आहले हर श्रद्धालु दा इत्थै सुआगत ऐ।

तोआई, जम्मू थमां अज्ज बड्डलै सख्त सुरक्षा बंदोबस्तें हेठ अमरनाथें दे 3 जहार 791 श्रद्धालुएं दा इक होर जत्था कश्मीर घाडी लेई रवाना होआ। जम्मू दे भगवती नगर आहले आधार शिविर “जातरी निवास” थमां लौहिकएं-बड्डिएं कुल 148 गड्डिएं दे काफले च रवाना कीते गेदे इनें श्रद्धालुएं च 3 जहार 67 मर्द, 522 महिलां, 9 न्याणे, 153 साधु, 39 साध्वियां ते 1 ट्रांसजेंडर शामिल ऐ। इन्दे चा 1 जहार 208 श्रद्धालु बालटाल ते 2 जहार 583 श्रद्धालु पैहलगाम आहले रस्तेया पवित्तर गुफा लेई अपना अग्गे दा सफर शुरू करडन। जातरा गी लेइयें आकाशवाणी कन्नै अपनी खुशी ते उत्साह प्रगट करदे होई श्रद्धालुएं दा आखना ऐ।

<><><><><><>

LG-Baltal Visit

लेफ्टिनेंट गवर्नर मनोज सिन्हा होरें कल बालटाल आधार शिविर दा दौरा लाइयें श्री अमरनाथ जी दी जातरा लेई कीते गेदे बंदोबस्तें दा जायजा लैता। अपने दौरें दरान एलजी होरें सरबंधत अधिकारिणं ते सुरक्षा एजेंसिणं दे कन्नै इक उच्ची-सतह दी बैठक लाई ते श्रद्धालुणं लेई कीते गेदे बंदोबस्तें जि'आं खाने-पीने, रौहने-बौहने, सेहत दिक्खभाल, साफ-सफाई, संपर्क ते बिजली-पानी वगैरा जनेय प्रबंधें दी समीक्षा कीती। बेस कैंप आहले अस्पताल च श्री सिन्हा होरें डाक्टरें कन्नै गल्लबात कीती ते उत्थे उपलब्ध मेडिकल सेवाएं दा निरीक्षण कीता। एलजी होरें इस दरान श्रद्धालुणं ते सेवां उपलब्ध करोआने आहलें कन्नै बी गल्लबात कीती ते उं'दे शा प्रतिक्रियां हासल कीतीआं। सब्भनें मैहकमें दे जतनें दी सराहना करदे होई उं'नें देसै दे बक्ख-बक्ख हिस्सें थमां आए दे श्रद्धालुणं गी इक यादगार अनुभव हासल करोआने दी जरूरतै पर जोर पाया। तोआई इस सरबंधें च मीडिया कन्नै गल्ल करदे होई नोडल अफसर डाक्टर शाहिद इकबाल होरें आखेआ

<><><><><><>

Dar-Statehood

राई-बाई मंत्री जावेद अहमद डार होरें मेद बुज्झी ऐ जे जम्मू-कश्मीर दा राज्य दा दर्जा तौले ब्हाल करी दिता जाहग। उं'नें आखेआ जे प्रधानमंत्री नरेन्द्र मोदी ते गृह मंत्री अमित शाह होर बी संसद च इस बारै केन्द्र सरकार दी वचनबद्धता गी दोहराई चुके दे न।

इस सरबंध्यै च मीडिया कन्ने गल्लबात करदे होई मंत्री जावेद डार होरें आखेआ जे राज्य दा दर्जा ब्हाल करने दा खीरी फैसला केन्द्र सरकार नै लैना ऐ पर राज्य दी सरकार इसी लेइयै आशावादी ऐ। उ'नें आखेआ

ढांचागत विकास बारै बोलदे होई मंत्री होरें सिइकें ते सेहत दे खेतरें च होए दे सुधारें पर लोस पाई। उ'नें आखेआ जे मजूदा प्रशासन हेठ हून हर इक हलका, बल्लें-बल्लें विकास बाददे दी बता पर अगड़ा बधा करदा ऐ।

<><><><><><>

Kishtwar-Exchange of Fire

किश्तवाड़ जिले दे खानकू आहले जांगली इलाके च आतंकवादिं ते सुरक्षाबलें बश्कार गोलीबारी दी खबर ऐ। आकाशवाणी दे जम्मू संवाददाता नै जानकारी दिती ऐ जे कल संझा डच्चन ते नागसेनी बश्कार दे इलाके च आतंकवादिं दी नकलो-हरकत बारै सूह थोने परेंत मकामी पुलस ते फौज नै इलाके गी घेरियै तुपाई अभियान शुरू कीता जिस दरान जंगलै च छप्पे दे आतंकवादिं गोली चलाई जेदा सुरक्षाबलें बी परता दिता ते द'ऊं तरफा गोलीबारी किश गै चिरै तोड़ी जारी रेही। उआं ताजा झड़फ जा गोलीबारी बारै कोई जानकारी नेई ऐ, पर बादू नफरी सददियै आतंकवादिं गी तुप्पने लेई अभियान जारी ऐ। होर ब्यौरे गी बलगेआ जा करदा ऐ।

<><><><><><>

Rana-Floods

जंगलात मंत्री जावेद अहमद राणा होरें पुंछ जिले दी मेंढर सब-डिवीजन दे बालाकोट इलाके दा दौरा लाइयै उत्थे हाल दिएं भारी बरखें करी होए दे नुक्सान दा आंकलन कीता ते जमीनी सतह पर बने दे हालात दा जायजा लैता। इस मौके पर केई सीनियर ऐहलकार बी मंत्री हुं'दे कन्नै हे। राणा होरें अपने दौरे दरान प्रभावत इलाकें दा व्यापक दौरा लाइयै मुकामी बसनीकें कन्नै गल्लबात कीती ते उ'नेंगी जकीन दोआया जे सरकार कुदरती क्रोपी दी मारै हेठ आए दे परोआरें गी हर मुमकन मदाद उपलब्ध करोआने लेई वचनें बज्झी दी ऐ। उ'नें जोर देइयै आखेआ जे प्रभावत इलाकें च पुर्नबहाली ते निर्माण कम्में गी बड़े योजनाबद्ध ढंगगै'ने तोढ़ चाढ़ेआ जाहग।

<><><><><><>

Weather

ते हून खबर मौसम दे बारै च। जम्मू-कश्मीर च मौसम दे सूरते-हाल च अज्जै थमां फही बदलाव दे असार न। मौसम विभाग नै अज्जै थमां लेइयै 23 जुलाई तोहड़ी, अगले त्रै दिनें दरान खिते च बरखा दी मेद दस्सी ऐ। मौसम विभाग नै खिते लेई बरखा सरबंधी येलो ते ऑरेंज अलर्ट जारी कीते न। इस सरबंधे च पेश ऐ साढ़ी एह खास रिपोर्ट

<><><><><><>

Bhal Padri Festival

सैलसफा गी बढावा देने दे मकसद कन्नै डोडा जिले दे भाल-पदरी इलाके च कल आयोजित कीते गेदे 'भाल-पदरी जंगलात ते सैलसफा उत्सव' च खरी मती गिनतरी च लोकें हिस्सा लैता। जिला इंतजामिया ते सैलसफा मैहकमे दी सांझ-भ्याली कन्नै आयोजित कीते गेदे इस उत्सव नै भलेसा दी कुदरती खूबसूरती ते उत्थुं दी सग्गोसार सांस्कृतिक विरासत गी बड़े बधिया ढंगगै'नै प्रदर्शित कीता। उत्सव च हिस्सा लैने आहले लोकें कल पारंपरिक संगीत, लोक नाच ते रोमांच आहिलें गतिविधिं दा नंद लैने दे कन्नो-कन्नी रूख-बूहटे लाने सरबंधी इक कार्यक्रमें च बी हिस्सा लैता। कार्यक्रम दा समापन इक बड़े बधिया मुशायरे कन्नै होआ। इस उत्सव दा मकसद खिते च सैलसफा गी बढावा देने ते इस सरबंधी गतिविधिं च लोकें दी भागीदारी जकीनी बनाना हा।



Passport-Van

बदेश मंत्रालय नै जम्मू च इक गश्ती पासपोर्ट वैन दी सेवा शुरु कीती ऐ तांजे लोकें गी, खासकरियै दूर-दरेडे ते पच्छेत्रे इलाकें च रौहने आहले बसनीकें गी उं'दे घरें कश गै पासपोर्ट सरबंधी सेवां उपलब्ध करोआइयां जाई सकन। ज्वाईट सैक्रेटरी ते मुख्क पासपोर्ट अधिकारी डाक्टर के.जे. श्रीनिवास हुं'दे आसेआ शुरु करोआई गेदी एह वैन सेवा, पासपोर्ट सरबंधी आवेदनं गी मंजूर करने ते मौके पर गै सरबंधत औपचारिकताएं गी पूरा करोआने च सक्षम होग।

इस पैहलकदमी दा मकसद पासपोर्ट आवेदन प्रक्रिया गी मता सखल्ला ते लोकें दी पुज्ज आहला बनाना ऐ तांजे लोकें गी पासपोर्ट सेवा केन्द्रें च जाने दी लोड नेईं पवै। इस सरबंधै च होर जानकारी सांझी करदे होई ज्वाईंट सैक्रेटरी ते मुख पासपोर्ट अधिकारी डाक्टर के.जे. श्रीनिवास होरें आखेआ

<><><><><><>

Traffic

ट्रैफिक पुलसै जम्मू-श्रीनगर राश्ट्र जरनैली सिडक - एनएच44 पर जातरा लेईं सलाह जारी कीती ऐ। एहदे मूजब, मौसम साफ रौहने दी सूरतें च श्री अमरनाथ जी दी जातरा कानवाई ते हौली मोटर गड्डिएं गी दौने बक्खी दा आओजाई दी खुल्ल होग। उ'आं जम्मू थमां घाटी जाने आहली गड्डिएं गी बड्डलै 6 बजे शा लेइयै दपैही 12 बजे तोहड़ी नगरोटा पार करना होग जिसलै के उधमपुर गी पार करने लेईं बड्डलै 7 बजे शा दपैही 1 बजे दा समें मुकरर कीता गेदा ऐ। इस्सै चाल्ली काजीगुंड थमां जम्मू औने लेईं दिनै साड्डे 11 बजे शा दपैही 2 बजे दा समें तय कीता गेदा ऐ। बड्डी मोटर गड्डिएं गी इक दिन छोड़ियै इक दिन चलने दी खुल्ल दिती गेई ऐ। एहदे अलावा रियासी, कटरा, उधमपुर, पत्नीटॉप, डोडा ते रामबन जाने आहले बसनीकें गी सलाह दिती गेई ऐ जे ओह तय समें दे बाद अपने इलाकें बक्खी जाने लेईं अपनी रिहायश सरबंधी शिनाख्ती कार्ड कन्नै रक्खन।

<><><><><><>